

Član 9.

U Tarifi sudskih taksi DIO PETI. UPIS U SUDSKI REGISTAR, Tarifni broj 20 (taksa za upise u sudski registar) tačke (1), (2), (3), (4), (5) i (11) mijenjaju se i glase:

„(1) Za rješenje o upisu osnivanja privrednog društva plaća se taksa u iznosu od 300,00 KM.

(2) Za rješenje o upisu osnivanja dijelova privrednog društva plaća se taksa u iznosu od 100,00 KM.

(3) Za rješenje o upisu osnivanja drugih pravnih lica koji nisu navedeni u stavovima (1) i (2) ovog tarifnog broja, plaća se taksa u iznosu od 200,00 KM.

(4) Za rješenje o upisu lica ovlaštenog za zastupanje pravnog lica, plaća se taksa u iznosu od 100,00 KM.

(5) Za rješenje o upisu prava vršenja vanjskotrgovinskog prometa, plaća se taksa u iznosu od 250,00 KM, pored iznosa iz stava (1) ovog Tarifnog broja.

(11) Za žalbu na rješenje doneseno u postupku upisa u sudski registar, plaća se taksa u iznosu od 100,00 KM.“

Član 10.

U Tarifi sudskih taksi DIO SEDMI. POSEBNI SLUČAJEVI, iza Tarifnog broja 27 (taksa za prijepise) dodaje se novi Tarifni broj 27.a, koji glasi:

„Tarifni broj 27a

(taksa za izdavanje jedinstvenog pristupnog koda – JPK-a)

(1) Za podnesak kojim se traži izdavanje jedinstvenog pristupnog koda za uvid u predmete, plaća se taksa u iznosu od 4,5 KM.

(2) Za izdati jedinstveni pristupni kod, plaća se taksa u iznosu od 5,00 KM.“

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
SKUPŠTINA

Broj: 02-01-VII-140/15
Mostar, 29.05.2015. godine

PREDSJEDAVALJUĆI
Šerif Špago, s.r.

176

Na osnovu člana 39. Ustava Hercegovačko-neretvanskog kantona („Službene novine HNK“, broj: 2/98,4/00 i 7/04) Skupština Hercegovačko-neretvanskog kantona je na sjednici održanoj 29.05.2015. godine, donijela

ZAKON O TRŽIŠNOJ INSPEKCIJI U HERCEGOVAČKO-NERETVANSKOM KANTONU

I. OPĆE ODREDBE

Član 1.

Ovim Zakonom uređuje se inspeksijski nadzor nad izvršavanjem zakona, drugih propisa, općih i pojedinačnih akata, normativa i standarda koji se primjenjuju na rad i poslovanje poduzeća, samostalnih radnji i drugih pravnih i fizičkih lica u oblastima proizvodnje, prometa roba i prometa usluga: ugostiteljskih, turističkih, zanatskih, intelektualnih, agencijskih i drugih usluga, autorskih prava i drugih oblika samostalnog privređivanja na teritoriji Hercegovačko-neretvanskog kantona (u daljem tekstu: Kantona), kao i ovlaštenja i dužnosti inspektora u vršenju inspeksijskog nadzora.

II. DJELOKRUG I UREĐENJE TRŽIŠNE INSPEKCIJE, TE USLOVI ZA OBAVLJANJE INSPEKCIJSKIH POSLOVA

II.1. Djelokrug tržišne inspekcije

Član 2.

- (1) U oblastima tržišna inspekcija kontrolira:
- a) način i uslove obavljanja privrednih djelatnosti na domaćem tržištu ako posebnim zakonom nije određena nadležnost drugog organa državne uprave;
 - b) obavljanje zanata, ako zakonom nije određena nadležnost drugih organa državne uprave;
 - c) zaštitu potrošača;
 - d) cijena proizvoda i usluga, naknade, takse (osim upravnih i sudskih) pretplate i druge slične naknade koje se zaračunavaju po propisu;
 - e) kvalitet proizvoda;
 - f) valjanost žigova i isprava o ispravnosti mjerila, te ispunjenja mjeriteljskih zahtjeva za pakiranje;

g) upotrebu mjernih jedinica i njihovo navođenje u prometu roba;

h) zaštitu znakova razlikovanja proizvoda u prometu roba.

(2) Tržišna inspekcija obavlja i druge inspekcijske poslove određene zakonom ili drugim propisima.

(3) U obavljanju djelatnosti saobraćaja i veza, komunalnih djelatnosti, vaspitanja i obrazovanja, nauke, kulture, informiranja, sporta, fizičke kulture, zaštite o djeci, zdravstva, socijalne zaštite i zaštite o invalidima, tržišna inspekcija ima pravo inspekcijskog nadzora samo nad primjenom propisa koji se odnose na cijene i zaštitu korisnika usluga, ukoliko propisima kojim se uređuje obavljanje ovih djelatnosti nije drugačije određeno.

Član 3.

Tržišne inspekcije obavljaju neposredan nadzor nad primjenom zakona i drugih propisa, kojima se uređuje obavljanje trgovine na veliko i malo, kontrolu primjene propisa donesenih iz njihove nadležnosti.

II.2. Uređenje tržišne inspekcije

Član 4.

(1) Poslove nadzora iz člana 1. ovog zakona, obavljaju organi uprave nadležni za poslove tržišne inspekcije (u daljem tekstu: tržišne inspekcije) Kantona, općini, odnosno Gradu Mostaru.

(2) Poslove tržišne inspekcije vrše tržišni inspektori.

Član 5.

(1) Tržišne inspekcije obavljaju neposredni nadzor nad primjenom zakona i drugih propisa kojima se uređuje obavljanje trgovine, trgovinskih i drugih usluga, nadziru kvalitetu proizvoda u proizvodnji, te zaštitu izuma, tehničkih unapređenja i znakova kvaliteta.

(2) Kantonalna tržišna inspekcija obavlja i sljedeće poslove:

- a) nadzor nad radom inspektora u općini, odnosno Gradu Mostaru;
- b) koordinira rad inspektora na teritoriji Kantona,
- c) brine se o stručnom osposobljavanju tržišnih inspektora i pruža im neposrednu stručnu pomoć;
- d) analizira mjesečne izvještaje tržišne inspekcije općina i Grada Mostara.

Član 6.

(1) Tržišni inspektor samostalno obavlja inspekcijski nadzor i odlučuje o poduzimanju

upravnih i drugih mjera.

(2) Samostalnost tržišnog inspektora u skladu sa stavom 1. ovog člana ne isključuje pravo glavnog kantonalnog inspektora da izdaje naređenja inspektorima za obavljanje inspekcijskog nadzora.

II.3. Uslovi za obavljanje inspekcijskih poslova

Član 7.

Za općinskog tržišnog inspektora odnosno inspektora Grada Mostara može biti postavljena osoba koja pored opštih uslova ispunjava i sljedeće posebne uslove:

da ima visoku stručnu spremu, odgovarajućeg smjera ili visoko obrazovanje prvog ciklusa (koji se vrednuje sa 240 ECTS bodova) ili drugog ili trećeg ciklusa obrazovanja po Bolonjskom sistemu studiranja, tri godine radnog iskustva u struci i položen stručni ispit.

Član 8.

Za kantonalnog tržišnog inspektora može biti postavljena osoba koja pored opštih uslova ispunjava i sljedeće posebne uslove:

da ima visoku stručnu spremu ili visoko obrazovanje prvog ciklusa (koji se vrednuje sa 240 ECTS bodova) ili drugog ili trećeg ciklusa obrazovanja po Bolonjskom sistemu studiranja, najmanje pet godina radnog iskustva u struci i položen stručni ispit.

III. PRAVA, OBAVEZE I OVLAŠTENJA INSPEKTORA

Član 9.

(1) Ovlaštenje za obavljanje inspekcijskog nadzora tržišni inspektor dokazuje posebnom iskaznicom.

(2) Oblik i sadržaj iskaznice tržišnog inspektora propisuje ministar nadležan za poslove trgovine, turizma i zaštite okoliša Pravilnikom o iskaznici tržišnog inspektora.

(3) Pravilnik o izgledu iskaznice kantonalnog, općinskog i inspektora Grada Mostara propisat će ministar trgovine, turizma i zaštite okoliša.

Član 10.

Osnovna plaća glavnog kantonalnog inspektora, kantonalnih, općinskih i tržišnih inspektora Grada Mostara kao dodatak za obavljanje poslova sa posebnim ovlaštenjima i uslovima rada uvećava se za procent propisan posebnim propisom.

Član 11.

(1) U vršenju inspekcijskog nadzora pravno i fizičko lice (u daljem tekstu: subjekt nadzora) dužni su u momentu vršenja nadzora, na zahtjev inspektora, bez odlaganja, omogućiti mu:

- a) uvid u rješenje o upisu u sudski registar, odnosno odobrenje za rad;
- b) pregled poslovnih i pripadajućih im prostorija i drugih prostorija koje služe ili mogu služiti za obavljanje odgovarajuće djelatnosti, poslovnih prostora i objekata, uređaja i opreme, instalacija i sklopova, kapaciteta mašina, proces rada, poslovnu i tehničku dokumentaciju, poslovne knjige i druge evidencije i podatke, diskove sa informatičkim sistemima, isprave, druge dokumente i ugovore, uvozne deklaracije, fakture, zapisnike o izvršenim nivelacijama cijena, knjigovodstvenu i drugu dokumentaciju koja se odnosi na njihovo poslovanje, zatečene predmete i robu - bez obzira na namjenu i mjesto gdje se nalaze, bilješke i drugu korespondenciju o poslovanju subjekta nadzora;
- c) pregled vozila - bez obzira na njihovu namjenu i svojinu;
- d) uvid u ovlaštenje za upotrebu tuđe firme, žiga, znaka, oznake ili imena ili drugog vanjskog obilježja za proizvode zatečene na skladištu ili u prodaji;
- e) uvid u plombe i uvjerenja o ispravnosti mjerila i važnost žiga na mjerilima;
- f) uvid u dokumentaciju o zatečenim radnicima, o svojstvu radnika u radnom odnosu i dokaze o ispunjavanju posebnih uvjeta za obavljanje određenih poslova i zadataka;
- g) uvid u dokaze o pravu na korištenje autorskih prava, prava industrijske svojine i drugih potencijalnih i licencnih prava;
- h) uzimanje uzoraka radi vršenja analize;
- i) uvid u poslovne knjige koje se vode u skladu sa zakonom o porezima;
- j) uvid i u sve druge objekte i dokumenta koja su po ocjeni inspektora od značaja za inspekcijski nadzor, te omogućiti mu uvid u ostala pitanja propisana zakonom i podzakonskim aktima
- k) dostaviti tražene podatke koji su potrebni za obavljanje poslova iz djelokruga rada tržišne inspekcije i dozvoliti kontrolu poslovanja.

Član 12.

(1) U toku vršenja inspekcijskog nadzora inspektor u skladu sa zakonom i drugim propisima, može uzimati uzorke proizvoda radi davanja na analizu

ovlaštenim stručnim organizacijama radi utvrđivanja stvarnog u odnosu na deklarirani kvalitet proizvoda.

(2) U postupku uzimanja uzoraka subjekt nadzora dužan je osigurati učešće ovlaštenog lica i poduzimati potrebne radnje za čuvanje uzoraka do njihove otpreme ovlaštenoj stručnoj organizaciji.

(3) Troškove analize i troškove transporta uzorka snosi subjekt nadzora od kojeg je uzet uzorak.

(4) O svakom uzetom uzorku sastavlja se zapisnik.

Član 13.

(1) Ako prilikom inspekcijskog nadzora inspektor utvrdi da količina i vrsta uskladištene robe ili robe u prodaji ne odgovara vrsti i količini naznačene robe u raspoloživoj ulaznoj dokumentaciji, inspektor je ovlašten da izvrši popis zatečenih zaliha o trošku subjekta nadzora.

(2) Popis robe se može vršiti i u slučajevima da inspektor osnovano sumnja:

- a) da je u objektu vršena nezakonita nivelacija cijena;
- b) da je primljena ne evidentirana roba;
- c) da u objektu ima uvoznih proizvoda za koje se ne zna tko je proizvođač ili je u objektu primljena roba čije porijeklo nije moguće utvrditi u momentu nadzora.

(3) U trenutku inspekcijskog nadzora mora se osigurati i predložiti dokumentacija o svakom izvršenom popisu koji je sačinjen zbog izmjene cijene.

Član 14.

(1) Prilikom obavljanja inspekcijskog nadzora inspektor utvrđuje identitet osoba, sasluša odgovorne osobe i svjedoke, a po potrebi koristi se uslugama stručnih osoba i stručnih institucija (drugih organa).

(2) Tokom vršenja nadzora, odgovorna osoba subjekta nadzora, obavezna je prisustvovati u svim fazama inspekcijskog nadzora ili osigurati ovlaštenu zamjenu.

(3) O službenim radnjama, izvršenih prilikom inspekcijskog nadzora, inspektor je obavezan sačiniti zapisnik ili službenu zabilješku u skladu sa odredbama Zakona o upravnom postupku.

(4) Ako se u trenutku kontrole ne može osigurati odgovorna osoba, inspektor će na licu mjesta ostaviti poziv da u roku od dva dana a izuzetno do sedam dana, odgovorna osoba mora biti u navedeno vrijeme u objektu.

(5) Ako se odgovorna osoba subjekta nadzora ne odazove pozivu iz stava 4. ovog člana tržišni

inspektori imaju ovlaštenje da i bez prisutnosti odgovorne osobe izvrše inspekcijski nadzor.

Član 15.

Tržišni inspektori su dužni prilikom obavljanja inspekcijskog nadzora uzimati u razmatranje prijave građana i udruženja potrošača primljene usmeno ili u pismenoj formi.

Član 16.

Ako tržišni inspektor utvrdi da su povrijeđeni ili da nisu primjenjivani propisi čije izvršenje nadzire, ima pravo i obavezu:

- a) naložiti da se utvrđene nepravilnosti i nedostaci otklone u određenom roku, o čemu donosi i pismeno rješenje;
- b) izreći kaznu, ukoliko je za to odgovarajućim propisom ovlašten;
- c) poduzeti druge mjere, odnosno radnje, za čije je izvršenje ovlašten.

Član 17.

Tržišni inspektor izdaje rješenje o zabrani obavljanja određene privredne djelatnosti ako je za to ovlašten posebnim propisom.

Član 18.

(1) Ako se prilikom prodaje robe subjekt nadzora ne pridržava propisane ili obavezne cijene, tržišni inspektor izdaje rješenje o privremenom oduzimanju razlike u cijeni po kojoj je roba prodana i cijene po kojoj je subjekt nadzora bio obavezan prodati robu.

(2) Rješenjem iz prethodnog stava naložit će se i prodaja robe po propisanoj, odnosno obaveznoj cijeni.

(3) Protiv konačnog rješenja iz stava 1., ovog člana subjekt nadzora ne može pokrenuti upravni spor.

(4) Konačnu odluku o oduzimanju nezakonito ostvarene dobiti na razlici u cijeni donosi nadležni sud u postupku zbog prekršaja.

Član 19.

(1) Ako tržišni inspektor utvrdi da je povredom propisa učinjen prekršaj ili krivično djelo, obavezan je odmah a najduže u roku od tri dana podnijeti zahtjev za pokretanje prekršajnog postupka, odnosno prijavu za pokretanje postupka zbog krivičnog djela.

(2) Protiv rješenja o prekršaju žalbu može izjaviti i tržišna inspekcija čiji je inspektor podnio zahtjev za pokretanje prekršajnog postupka.

Član 20.

(1) Ako je propisom predviđena mogućnost oduzimanja predmeta za koji se osnovano sumnja da je njime učinjeno krivično djelo ili prekršaj, tržišni inspektor može privremeno oduzeti taj predmet.

(2) O oduzimanju predmeta tržišni inspektor je dužan da izda potvrdu s tačnim naznačenjem oduzetog predmeta.

(3) O izvršenom privremenom oduzimanju predmeta, tržišni inspektor je dužan odmah obavijestiti organ nadležan za pokretanje postupka zbog učinjenog krivičnog djela odnosno prekršaja.

(4) Ako je oduzeti predmet podložan brzom kvaru ili ako njegovo čuvanje iziskuje nesrazmjerne troškove, inspektor je ovlašten odrediti prodaju predmeta, o čemu je obavezan izvijestiti organ nadležan za pokretanje postupka.

Član 21.

(1) Protiv rješenja o određivanju upravne mjere, koju je na osnovu ovog zakona ili drugog propisa donio tržišni inspektor općine odnosno Grada Mostara ili kantonalni tržišni inspektor, može se u roku od osam dana od dana prijema rješenja podnijeti žalba Ministarstvu trgovine, turizma i zaštite okoliša HNK.

(2) Žalba protiv rješenja iz stava 1. ovog člana ne odlaže izvršenje rješenja.

Član 22.

Tržišni inspektor je dužan čuvati kao službenu tajnu podatke za koje sazna prilikom obavljanja nadzora ili koje mu subjekt nadzora dostavi ako je propisano da su ti podaci tajna.

Član 23.

Nadležni organ unutrašnjih poslova pod uslovima i na način utvrđen zakonom, dužan je osigurati službenu osobu u cilju zaštite inspektora prilikom obavljanja poslova iz svoje nadležnosti.

Član 24.

Prilikom zatvaranja objekta isti se pečate voskom, špagom, lokotom, trakom ili na drugi način za kojeg tržišni inspektor ocijeni da je ispravan, a odgovornost za čuvanje i osiguranje objekta snosi subjekt nadzora.

IV. PREKRŠAJNE ODREDBE

Član 25.

(1) Novčanom kaznom od 3.000 do 15.000 KM kaznit će se za prekršaj subjekt nadzora (pravno lice), ako ne dozvoli tržišnom inspektor pregled poslovne dokumentacije, robe, poslovnog prostora, tuđih

Hercegovačko-neretvanskog kantona

ovlaštenja, mjerila i mjernih jedinica, dokaza o pravu korištenja autorskih prava i ukoliko na bilo koji način ometa taj pregled (član 11. zakona).

(2) Za prekršaj iz stava 1. ovog člana kaznit će se i odgovorno lice u pravnom licu novčanom kaznom od 1.000 do 3.000 KM.

(3) Za prekršaj iz stava 1. ovog člana kaznit će se fizičko lice novčanom kaznom od 1.000 do 3.000 KM.

Član 26.

Novčanom kaznom od 3.000 do 15.000 KM kaznit će se za prekršaj pravno lice ili drugo odgovorno lice, a fizičko lice kaznom od 1.000 do 3.000 KM ako ne postupi po mjerama odnosno radnjama tržišnog inspektora (član 16.).

V. PRELAZNE I ZAVRŠNE ODREDBE

Član 27.

Kantonalni tržišni, općinski i inspektori Grada Mostara obavljat će inspekcijski nadzor u skladu sa zatečenim propisima na svim nivoima koji regulišu oblasti iz člana 1. ovog Zakona do donošenja kantonalnih propisa.

Član 28.

Ministar nadležan za poslove trgovine, turizma i zaštite okoliša će donijeti Pravilnik iz člana 9. stav 3. ovog Zakona u roku od dva mjeseca od dana stupanja na snagu ovog Zakona.

Član 29.

Ovaj Zakon stupa na snagu osmog dana od dana objavljivanja u "Službenim novinama Hercegovačko-neretvanskog kantona".

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
S K U P Š T I N A

Broj: 02-01-VII-141/15
Mostar, 29.05.2015. godine

PREDSJEDAVALJUĆI
Šerif Špago, s.r.

177

Na osnovu člana 39. Ustava Hercegovačko-neretvanskog kantona („Službene novine HNK“, broj: 2/98, 4/00 i 7/04), člana 6. Zakona o javnom pravobranilaštvu Hercegovačko-neretvanskog kantona („Službene novine HNK“, broj: 8/99, 3/04 i 11/08) i člana 94. Poslovnika o radu Skupštine HNK („Službene novine HNK“, broj 2/05) Skupština Hercegovačko-neretvanskog kantona, na sjednici održanoj dana 29.05.2015. godine, donijela je

ODLUKU
O USVAJANJU IZVJEŠTAJA O
RADU KANTONALNOG JAVNOG
PRAVOBRANILAŠTVA ZA 2014. GODINU

I

Usvaja se Izvještaj o radu Kantonalnog javnog pravobranilaštva za 2014. godinu.

II

Odluka stupa na snagu danom donošenja, a objavit će se u „Službenim novinama Hercegovačko-neretvanskog kantona“.

Bosna i Hercegovina
Federacija Bosne i Hercegovine
Hercegovačko-neretvanski kanton
S K U P Š T I N A
Broj: 02-01-VII-142/15
Mostar, 29.05.2015. godine

PREDSJEDAVALJUĆI
Šerif Špago, s.r.

178

Na osnovu člana 39. Ustava Hercegovačko-neretvanskog kantona („Službene novine HNK“, broj: 2/98, 4/00 i 7/04), te člana 94. Poslovnika Skupštine („Službene novine HNK“, broj 2/05), Skupština Hercegovačko-neretvanskog kantona na sjednici održanoj dana 29.05.2015. godine, donosi

ODLUKU

I

Odobrava se prijava Vlade Hercegovačko-neretvanskog kantona na javni poziv za učestvovanje